



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 555/prot.

Tiranë, më 04.10.2024

VENDIM

Nr. 1113, Datë 04.10. 2024

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË KCA DEUTAG INTERNATIONAL LIMITED NGA SHOQËRIA HP GLOBAL HOLDINGS LIMITED.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Znj.	Fatjola DELIJA	Anëtar

Në mbledhjen e tij të datës 04.10. 2024, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të shoqërisë KCA Deutag International Limited nga shoqëria HP GLOBAL HOLDINGS LIMITED.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfimit të kontrollit të shoqërisë KCA Deutag International Limited nga shoqëria HP GLOBAL HOLDINGS LIMITED.

VËREN SE :

I. Palët në transaksion dhe procedura

Pranë Autoritetit të Konkurrencës është njoftuar transaksioni i përfutimit të kontrollit të shoqërisë KCA Deutag International Limited nga shoqëria HP GLOBAL HOLDINGS LIMITED.

Referuar dokumentit “Marrëveshje Shit-Blerje”, nënshkruar më datë 25 korrik 2024, palët në marrëveshje janë:

Pala blerëse:

Blerësi: HP GLOBAL HOLDINGS LIMITED është një shoqëri private me përgjegjësi të kufizuar, me aksione të inkuorporuara në Jersey. HP GLOBAL HOLDINGS LIMITED është një shoqëri e themeluar për qëllim të këtij transaksioni (SPV). HP GLOBAL HOLDINGS LIMITED zotërohet plotësisht në mënyrë indirekte nga shoqëria Helmerich & Payne, Inc.

Garantuesi i Blerësit: HELMERICH & PAYNE, INC. është një korporatë e themeluar sipas ligjit të përgjithshëm të Korporatës të shtetit Delaware, SHBA, me objekt aktiviteti: Të ushtrojë biznesin e prodhimit, blerjes, shitjes dhe asgjësimit dhe kthimit në llogari, shpërndarjes së naftës, naftës bruto dhe gazit të të gjitha llojeve, etj. Aktualisht HELMERICH & PAYNE, INC. ofron, përmes filialeve të saj, shërbim të kontraktuar për shpime me një flotë prej rreth 160 pajisjesh aktive, kryesisht në SHBA, si dhe në Gjirin e Meksikës, Argjentinë, Kolumbi, Bahrein, Australi dhe Emiratet e Bashkuara Arabe.

Pala shitëse:

Shitësit me shumicë aksionesh: përcaktuar në pjesën 1 të shtojcës 1 të Marrëveshjes.

Shitësit kryesorë: Ocorian Limited është një shoqëri private me përgjegjësi të kufizuar, dhe aksione të inkuorporuara në Jersey. Kjo shoqëri është në cilësinë e vet si administrues i besuar i Planit të Kapitalit të shoqërisë KCA Deutag International Limited (Administratori i Besuar, së bashku me shitësit me Shumicë Aksionesh dhe Shitësin Menaxhues).

Shitësit menaxhues: Z. Joseph Elkhoury, përcaktuar në pjesën 2 të shtojcës 1 të Marrëveshjes.

Target: KCA Deutag International Limited është një shoqëri private me përgjegjësi të kufizuar, me aksione të inkuorporuara në Jersey, me seli në Aberdeen, Mbretëria e Bashkuar dhe vepron si një partner kryesor në fushën e shpimit, inxhinierisë dhe teknologjisë në tregjet globale të energjisë aktuale dhe të ardhshme.

KCA Deutag International Limited ka të regjistruar në Shqipëri, degën e saj - **KCA Deutag Drilling GmbH Dega në Shqipëri – Degë e shoqërisë së huaj**, e regjistruar me kohëzgjatje të papërcaktuar, me fushë veprimtarie: Hapja/shpimi i puseve të çdo lloji dhe kryerja e punëve/shërbimeve që lidhen me to në të gjithë botën dhe veçanërisht realizimi i shpimeve në thellësi dhe punëve përkatëse me qëllim përmirësimit të tyre.

II. Transaksioni

Më 25 korrik 2024 ndërmjet palës shitëse: shitësve me shumicë të aksioneve, shitësit menaxhues, shoqërisë Ocorian Limited dhe palës blerëse: shoqërisë HP GLOBAL HOLDINGS LIMITED (blerësi), shoqërisë HELMERICH & PAYNE, INC. (garantuesi i blerësit) dhe, vetëm për qëllimet e

përcaktuara në pikën 18.5 të marrëveshjes, shoqëria KCA Deutag International Limited, është nënshkruar, "Marrëveshje Shit - Blerje".

Blerësi ka rënë dakord të blejë të gjithë kapitalin aksionar të emetuar të shoqërisë si vijon: (i) secili nga Administratori i Besuar dhe Shitësi Menaxhues ka rënë dakord të shesë aksionet e përcaktuara për secilin; (ii) shitësit me Shumicë Aksionesh kanë rënë dakord për ti dorëzuar blerësit të gjitha aksionet e shitësit me Shumicë Aksionesh, dhe; (iii) Blerësi do të dërgojë një njoftim për t'ju bashkuar shitjes Shitësve me Pakicë aksionesh, në bazë të të cilit Shitësve të Pakicës do t'u kërkohej të transferojnë të gjitha aksionet e tyre në pakicë të blerësi.

Garantuesi i blerësit është shoqëria aksionare përfundimtare e blerësit dhe është e gatshme të garantojë detyrimet e blerësit sipas kësaj Marrëveshje.

Pala njoftuese sqaron se me përmbushjen e kësaj kontrate HP GLOBAL HOLDINGS LIMITED do të zotërojë plotësisht kapitalin aksionar të shoqërisë target KCA Deutag International Limited. Shoqëria HELMERICH & PAYNE, INC. do të zotërojë indirekt shoqërinë KCA Deutag International Limited.

Referuar dokumentacionit të depozituar, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 "Për mbrojtjen e konkurrencës", i cili është objekt autorizimi nga Komisioni i Konkurrencës.

III. Analiza e konkurrencës

Referuar nenit 3, pika 7, të ligjit nr. 9121, datë 28.07.2003 "Për mbrojtjen e konkurrencës", si edhe Udhëzimit nr.76, datë 07.04.2008 "Për përcaktimin e tregut përkatës", treg përkatës i produktit do të konsiderohet tregu i ofrimit të shërbimit të shpimit të puseve dhe shërbimeve inxhinierike dhe teknologjike të lidhura me to, por duke qenë se transaksioni nuk do të ketë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i synuar konsiston në përfitim të kontrollit të shoqërisë KCA Deutag International Limited nga shoqëria HP GLOBAL HOLDINGS LIMITED.

HP GLOBAL HOLDINGS LIMITED është një shoqëri private, e themeluar sipas legjislacionit të Jersey, e cila zotërohet plotësisht në mënyrë indirekte nga HELMERICH & PAYNE, INC..

HELMERICH & PAYNE, INC. është një shoqëri e themeluar sipas legjislacionit të shtetit të Delaware, aksionet e së cilës janë të listuara dhe tregtohen në Bursën e Nju Jorkut.

HELMERICH & PAYNE, INC. nuk ka filial në Shqipëri dhe nuk realizon të ardhura në Shqipëri.

KCA Deutag International Limited është një shoqëri e themeluar sipas legjislacionit të Jersey. Ajo është një shoqëri holding, filialet kryesore të së cilës ofrojnë shërbime inxhinierike dhe teknologjike të shpimit të puseve dhe objekteve në baza mbarë botërore për industrinë e energjisë, duke qenë një kompani lider në fushën e shpimit, inxhinierisë dhe teknologjisë në tregjet globale të energjisë.

KCA Deutag International Limited ka regjistruar në Shqipëri degën e saj – KCA Deutag Drilling GmbH Dega në Shqipëri, e cila ka për objekt aktiviteti hapjen/shpimin e puseve të çdo lloji dhe



kryerjen e punëve/shërbimeve që lidhen me to në të gjithë botën dhe veçanërisht realizimin e shpimeve në thellësi dhe punëve përkatëse me qëllim përmirësimin e tyre.

Targeti, KCA Deutag International Limited operoi një platformë shpimi në Shqipëri në vitin 2023, e cila nuk është më aktive dhe është planifikuar të largohet nga vendi gjatë vitit 2024.

Për sa më sipër, meqenëse HP GLOBAL HOLDINGS LIMITED nuk ka aktivitet në Shqipëri, ndërsa targeti, KCA Deutag International Limited është planifikuar të largohet nga vendi gjatë vitit 2024 transaksioni i propozuar nuk do të ngrejë shqetësime në lidhje me konkurrencën në Shqipëri.

Nga sa më sipër, transaksioni i njoftuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni nuk pritet të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e propozuar nëpërmjet përfutimit të kontrollit të shoqërisë KCA Deutag International Limited nga shoqëria HP GLOBAL HOLDINGS LIMITED.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Leida MATJA

Zv/Kryetar

Rezana KONOMI

Anëtar

Fatjola DELIJA

Anëtar

Denar BIBA

Kryetar

